

海

國

圖

志

海國圖志卷二十三

西南洋

歐羅巴

侯官林則徐

邵陽魏源重輯

西印度西巴社國

一作包社一作高奢一作報達一名百爾西亞即漢之安息唐

之大食皆屬西印度西地

巴社國又名巴爾齊亞在都魯機之東西與都魯機毘

連以戈厘斯頓山為界東與新都司頓毘連即溫都斯坦以

比魯山為界北與俄羅斯韃韃里毘連韃韃里即西哈薩克西布魯特

各部以古疏山爲界南界海卽利瑪竇所謂默生丁海是也史記所載亦古名邦如阿西利阿巴比羅尼阿先日之國都卽巴社邊界之地也後有國中之西臘士征服巴比羅尼阿遂稱爲巴社國以伊士巴含爲國都恃其兵力遂取西里阿伊揖小阿細亞及東界之印度疆域之大古未有綸後以奢淫無度爲額力西所覆額力西一作厄勒祭在意大里國之東今并於西都魯機遂將巴社印度等處均改爲部落至耶穌紀歲三百年漢永康元年始有阿達色爾士奪回巴社自立爲王並敗羅汶之兵至七百年間唐武后則天年間爲

阿丹所滅改遵阿丹之回教率師東征拓地益廣忽又

被都魯機韃韃里互侵國中復爲戰場至千五百八十

六年

明萬曆十四年

國中阿巴士糾集部衆悉驅外國之人恢

復故都設官立政垂二百餘年復有阿富汗土作亂所

過焚戮人民塗炭越十有四年有高里坎王者起兵攻

擊阿富汗土自立爲王然以暴易暴身沒無嗣頭目爭

立爲一大將所據稱曰加林坎王在位十有六年身沒

國中復亂時耶穌之千七百七十九年也

乾隆四十四年

有聞

人阿牙磨哈墨者以兵定亂于千七百九十六年

嘉慶元年

始立發底阿里沙爲王厲精圖治百廢俱舉巴社之瘡
瘕稍息雖俄羅斯亦常侵擾奪去邊境數部而國中無
恙惟屢遭兵亂古昔典冊泯蕩無存改遵回教尊君卑
下尙勝于東方諸國各部頭目世襲其職擅財賦兵馬
各制一方國王不得過問各頭目角勝爭強人民伺勝
負爲去就彼勝歸彼此勝歸此故頭目爭結民心以自
固國王之女止與教師婚配不下嫁于頭目以其掌兵
恐謀篡奪國王額設護衛兵三千謂之王僕步兵萬二
千以爲外護按名給田耕屯自養其餘兵馬分統於各

頭目遇警徵調可二十餘萬善騎射而辛苦斷敵糧草
絕敵水道是其所長曾以此困羅汶後被韃靼里阿富
晏士攻敗從此兵威不振近世國王復按歐羅兵法訓
練其兵漸還舊觀佛蘭西王前曾遣牙鼎尼求援於巴
社以攻英吉利東邊之屬國英吉利旋亦使至巴社力
陳利害發佛蘭西詭謀巴社兵遂不東復請英國將官
往助訓練故其騎兵輕捷長于鎗劍復有鎗炮步兵萬
人皆合歐羅巴法度嗣值巴社與都魯機用兵英國恐
已將士助戰生衅盡召回本國其地平遠中央大山起

自都魯機之阿彌巴阿至南邊海岸深山大谷洞穴曲
通多爲盜窟平時專事劫奪有事亦可募爲軍鋒北界
俄羅斯時虞侵逼故近日國王移都于南並於加士比

奄海

卽裏海也亦名鹹海亦名北高海

設立水師防衛其國戶口傳聞

二萬萬人多黃色壯而不秀客籍流寓種類甚多國中
音語不一有額力西者有阿丹者有羅汶者有都魯機
者風俗虛假鮮實善諂媚尚禮貌一見如故久始知其
知有已不知有人也奢靡甲東方宮室外則磚石閭麗
內則陳設璀璨衣飾珠寶一衣有值十餘萬金至二十

三十萬金者、命婦衣皆絲縷、寬袍大袖、不蒙頭、不出戶也、顏色易凋、不十年儼如老嫗、母以子貴、無論嫡庶、尤喜良馬、不惜高價、其嗜馬之心、百物無以尚之、惟飲食蔬儉、罕供魚肉、筵宴賓客、僅以果品爲豐、巴社素稱文墨之邦、先日以詩名者、有哈斐士、長於揄頌、有沙底、善論風化、有法部西、工言情、歐羅巴之人、譯出讀之、文奇趣溢、各極其妙、然古時文學、早已殘缺、近日王重文學、每日必有詩人在側、曾對英吉利使者夸贊之、每一脫稿、卽賜一金錢潤筆、醫學、星算諸館、亦與文學並重、各

有教授傳習之人歲費三四十萬棒故巴社之人多信
星卜謂可致富貴歐羅巴人皆不信之俗奉回教以阿
厘爲宗主阿厘者馬哈墨之兄子亦卽其壻也阿厘之
教卽馬哈墨所傳都魯機阿丹等國均宗馬哈墨何以
各有不同互爭得失致成仇敵有謂阿厘之教雖授自
馬哈墨然其中悟會亦少有分別各自流傳遂成偏執
如巴社禁人不飲酒禮拜火神卽與他國回教不同產
米麥鹽絲髮五采地氊羊毛綢緞磁器紙皮寶石銅鐵
領小部落二百六十有六

部落名目
原本闕

西印度西巴社回國沿革

唐以前非回教已見西印度內唐以後爲大食

爲包社爲伯爾西亞國今與英吉利通和非其所屬○原無今補

〔新唐書〕大食本波斯地，男子鼻高黑而髯，女子白皙，出輒障面，日五拜天神，銀帶佩銀刀，不飲酒，舉樂有禮堂，容數百人，率七日王高坐爲下說，曰：「死敵者生天上，殺敵授福。」故俗勇于鬪，土磽确不可耕，獵而食肉，刻石蜜爲廬如輦狀，歲獻貴人葡萄，大者如雞卵，有千里馬，傳爲龍種。隋大業中有波斯國人牧于俱紛摩地，那山有獸，言曰：「山西三穴有利兵，黑石而白文，得之者王。」走視

如言石文言當反乃詭眾裒亡命于恒曷水劫商旅保
西鄙自王移黑石寶之國人往討之皆大敗還于是遂
強滅波斯破拂菻始有粟麥倉庾南侵婆羅門并諸國
勝兵至四十萬康石皆往臣之其地廣萬里東距突騎
斯西南屬海海中有撥拔力種無所屬附不生五穀食
肉刺牛血和乳飲之俗無衣服以羊皮自蔽婦人明皙
而麗多象牙及阿末香波斯賈人欲往市必數千人納
氈剺血誓乃交易兵多牙角而有弓矢鎧稍士至二十
萬數爲大食所破畧永徽二年大食王始遣使者朝貢

自言王大食氏有國三十四年傳二世開元初復遣使獻馬鈿帶謁見不拜有司將劾之中書令張說謂俗殊慕義不可寘于罪立宗赦之使者又來辭曰國人止拜天見王無拜也有司切責乃拜十四年遣使蘇黎滿獻方物拜果毅賜緋袍帶或曰大食族中有孤列種世酋長號白衣大食種有二姓一曰盆尼末換二曰奚深有摩訶末者勇而智眾立爲主闢地三千里克夏臘城傳十四世至末換殺兄自王下怨其忍有呼羅珊木鹿人並波悉林將討之徇眾曰助我者皆黑衣俄而眾數萬

卽殺末換求奚深種孫爲王更號黑衣大食至德初遣使者朝貢代宗取其兵平兩京貞元時與吐番相攻十四年遣使者三人朝東有末祿小國也治城郭多木姓以五月爲歲首以畫缸相獻有尋支瓜大者十人食乃盡蔬有顆蔥蒿藍軍達茭薤大食之西有苦國者北距突厥可薩部地數千里有五節度勝兵萬人土多禾有大川東流入亞俱羅商賈往來相望云自大食西十五日行得都盤西距羅刹支十五日行南卽大食二十五日行北勃達一月行勃達之東距大食二月行西抵岐

蘭二十日行南都沒北大食皆一月行岐蘭之東南二十日行得阿沒或曰阿昧東南距陀拔斯十五日行南沙蘭一月行北距海二日行居你訶溫多城宜馬羊俗柔寬故大食常游牧于此沙蘭東距羅利支北怛滿皆二十日行西卽大食二十五日行羅利支東距都盤北陀拔斯皆十五日行西沙蘭二十日行南大食二十五日行怛滿或曰怛沒東陀拔斯南大食皆一月行北岐蘭二十日行西卽大食一月行居烏澹河北平川中獸多獅子西北與史國接以鐵關爲限天寶六載都盤等

六國皆遣使者入朝

宋史大食國本波斯別種，隋大業中，據有波斯西境。唐永徽後，屢入朝。貢乾德四年，僧行勸游西域，因賜其王書，以招懷之。開寶中，太平興國貢方物，自後屢朝，職貢不絕。其從者目深體黑，謂之崑崙奴。其貢物有白龍腦、真珠、玻璃器、象牙、乳香、鑲鐵、紅絲、杏貝、五色羅、花番錦、薔薇水、龍鹽、銀藥。千年棗、駝毛褥。其國貢使自言與大秦國相鄰，爲其所屬，在都城介山海間。土產犀象、香藥。自泉州西北舟行四十餘日至藍里。次年乘風颿，又六

十餘日始達其國地雄壯廣大民俗侈麗甲于諸番天氣多寒其王錦衣玉帶躡金履朔望冠百寶純金冠其居以瑪瑙爲柱綠甘爲壁水晶爲瓦礫石爲磚帷幕用百花錦宮有丞相太尉各領兵馬二萬餘人馬高七尺士卒驍勇民居屋宇略同中國市肆多金銀綾錦工匠技術咸精其能建炎三年奉珠玉寶貝入貢帝曰大觀宣和間茶馬政廢武備不修致金人之禍今復捐數十萬緡以易無用之珠玉曷若惜財以養戰士乃卻貢優賜以荅遠人之意紹興初復貢文犀象齒朝廷亦厚賜

而不貪其利故遠人懷之貢賦不絕

職方外紀印度河之西有大國曰百爾西亞太古生民之始人類聚居言語惟一自洪水之後機智漸生人心好異卽其地創一高臺欲上窮天際天主憎其長傲遂亂諸人之語音爲七十二種各因其語散諸五方至今其址尙在名曰罷百爾譯言亂也謂亂天下之言也百爾西亞之初爲罷鼻落你亞幅員甚廣都城百二十門乘馬疾馳一日未能周也國中有一苑囿造於空際下以石柱擎之上承土石凡樓臺池沼草木鳥獸之屬無

不畢具大復踰千一邑天下七奇此亦一也後其國爲
百爾西亞所併遂稱今名至今強大國主嘗建一臺純
以所殺回回頭纍之臺成髑體幾五萬廿年前其國王
好獵一圍獲鹿至三萬欲侈其事亦聚其角爲臺今尙
存也又東撒馬兒罕界一塔皆以黃金鑄成上頂一金
剛石如胡桃光夜照十五里伯爾西亞地江河極大有
一河發水水所及處卽生各種名花南有島曰忽魯謨
斯在赤道北二十七度其地悉是鹽否則硫黃之屬草
木不生鳥獸絕跡人著皮履雨過履底輒敗多地震氣

候極熱人須坐卧水中沒至口方解又絕無淡水勺水亦從海外載至其艱如此因其地居三大州之中凡亞細亞歐羅巴利未亞之富商大賈多聚此地百貨駢集人烟輻輳凡海內極珍奇難致之物往輒取之如寄土人嘗言天下若一戒指此地則戒指中之寶物也

貿易通志曰西印度各洲在海中爲荷蘭佛蘭西西班牙英吉利分屬之藩國其中耕田之人皆黑面乃田主之奴他國多買雇而用之產白糖咖啡棉花烟酒薑與南海洲相類有古巴者西班牙之新地也道光八年貨

進口價銀千有九百五十萬員出口亦如之船千有八百八十九隻其他犂頭亦出入貨價三四百員英吉利所屬之西印度洲亦如之

萬圖地理全圖集曰白西國卽西印度之包社地也南及海隅北至西域裏湖並義羅斯藩屬國東至印度西接土耳其藩屬國北極出地自二十六度至四十度偏東四十四度至六十度其北方有高山數帶自遠視如鉅齒其河不長或入湖或浸於沙地有好馬奇羊國王當周秦年間強服鄰國唐朝年間棄所習崇火拜太陽

之教而爲回回往往自東自北有強敵侵其國而逐其君道光年間土君與義羅斯肇衅屢次戰敗割北方全地讓義羅斯而服事之雖英國大臣駐防者苦勸土君堅守然不得其志國王隨意賞罰如令將軍領師交戰而接捷音遂令之割陣亡敵人之耳獲勝是實王釋放戮殺不顧律例凡事自專其宮殿如仙境四面花園水池異鳥香煙縹緲珠玉交輝臣工百僚自視如奴。東北各地交界有西域游牧時時侵犯境界掠民爲奴而白西人不得折衝禦防居民共計一千三百萬丁皆奉

回回之教一飲釀酒喜得心花俱開農者勤勞種麥因
無水溝不得植稻葡萄豐生內地草場甚廣喂馬羊剪
羊毛造帕氈其價甚貴北地出銅及土油地面有鹽土
故田不膏腴土人好字作詩不盡唱和之歡土音和雅
聽之如作樂甚好飾身耗費銀錢又買好馬挺鎗躍騎
奔騰千里好禮百拜諛諛無實常時食煙遊玩居環土
牆內鋪呢氈夏冬洗身眉清目秀其女容儀雅媚但不
貴本地之女必由番國買來爲妾美豔易凋嫁後七八
年形容憔悴男將女嚴禁閨中若出過市則渾身蓋蔽

貶食省用只務外觀。○國之北部如額蘭部在裏海之濱，支流灌溉，林密草芳，省會居民六十萬，城多古蹟，昔有幾萬居民，今頽牆壞壁。○馬散地蘭部在裏海四圍，高峯山麓平地爲牧羊之所。○可刺散廣大地方，省會米食，居民五萬人，田畝雖豐，游牧賊心肆掠無忌，故農夫苦貧。○內地之部曰以辣山嶺不毛，谷內物產甚阜，但因戰釁之久，遍處頽廢，國都地希蘭周圍十四里，城池鞏固。○益巴罕城屋宇繁多，通商富裕，晝夜勤勞，東南磽土，惟葉大城居民繁多，生理富盛。○法耳辣城郊

外山水清秀國中詩人觀山玩水歌誦吟嘯其補食海口與印度國通商運出強馬紅棗珍珠運入各項南產布匹白西海隅有惡末嶼古時大市眾商聚會今已廢爲沙野部內有古蹟花柱舊廟大殿城瓦礫場遊人察其古蹟解其碑記乃古白西人崇火拜陽與西國交戰興工營築者。法南沿海徧小刺地沙惟出棗而已。東方克耳曼部居民養羴羊用之以織造花帕其價甚貴。西古西但省田肥土茂其河灌溉全境緣賊侵掠小民缺于日用。東南有沙野無水其王好戰率兵圍

甲布王之希辣城欲侵印度賴英國兵帥力行阻禦連
月奮死擊退

地球圖說白耳西亞國圖說東界亞加業坦國皮路直
坦國大布加利亞國南界白爾西亞海西界土耳其國
北界裏海并大布加利亞國其百姓約有九百萬之數
都城名第希蘭卽城內民十三萬大都回回教又另有
拜火之教名曰太陽教是國昔時威震諸國今不若昔
矣西北民最眾東南次之中有曠野以牧羊紡織毛布
呢氈爲業好尙服色頗知禮儀言語文式女容雅嫺

出外必遍身遮蔽交際專尙虛禮不守忠信遇有疑處
常食鴉片以解鬱悶然其食鴉片之形狀不似中國而
與土耳其國相似其飲食不用刀叉匙箸惟以手搏之
誠不美也自道光年間頻與俄羅斯國暨亞加業坦國
交戰未分勝負土產氍毹呢羊毛布綢緞葡萄酒羊馬
棗銅油鹽

再稽聖書所謂古聖人摩西與真神示誠於西奈山以
色列人奉摩西之諭避麥西國人之害追入紅海真神
卽合水以相滅其山其海均是在是國焉內有至曠之野

人民行走俱跨駱駝以牧羊馬爲生所居大都帳房但其風俗每多不善遇財卽劫誠可惡也土產喇啡棗子靛青藥材珠子駱駝良馬其馬上山如平地渡水似浮橋日行二百里

地里備考曰白爾西亞國又曰義蘭曰波斯在亞細亞洲之中北極出地二十五度三十分起至三十九度止經線自東四十一度四十分起至六十一度三十分止東至黑拉德阿付干北羅吉三國西連土耳其基國南接白爾西亞科曼二海灣北界達爾給厄羅斯二國暨加

斯比約海長約四千五百里寬約三千里地面積方約六十萬里烟戶九兆餘口本國地勢山陵疊起砂磧綿邈河之長者曰給拉曰加倫曰達波曰西達羅干曰的窩盧曰固爾曰給西魯森曰馬三德蘭湖之大者曰塞勒又名都刺海曰詩拉斯烏爾迷亞曰伊里完田土磽瘠惟詩拉斯伊巴汗義蘭馬三德蘭等處平原膏腴穀果豐茂禽獸充牣樹木蕭條土產銅銀鐵鉛絲麻烟酒窩宅花石硫磺磁砂磁器絲花珍珠藥材香料大黃鴉片氊毯牛皮等物地氣互異西冷南熱中溫王位相傳

所奉之教，乃回教也。技藝精巧，人烟輻輳，凡與鄰國交易，靡弗結隊而行，馱負運載。本國初併于美地亞國，周靈王十二年，有西祿斯者，復立國基，卽克服都蘭美地亞暨亞細亞州西方等處，越二百零七載，傳至達里約有馬塞多尼亞國君，攻奪其地，迨薨後，麾下諸將互分其地，各霸一方，稱王未幾，各嗣君陸續皆被羅馬國君所侵，惟本國屢挫其三軍，不致盡隸版圖。唐太宗貞觀十年，爲天方回人侵奪，宋理宗景定五年，又爲蒙古人兼併，越一百二十六載，土耳其亞國人逐去蒙古而據。

其地其後嗣君暴虐無道康熙三十三年國中變亂廢弑迭興索非斯君之後裔達馬斯者招兵買馬用賊首那的爾沙爲將許以重賞率討叛寇大獲全勝盡復失地其後那的爾沙貪婪無厭以賞不酬功爲詞遂行背叛將達馬斯君囚而弑之篡位爲王乾隆十二年被臣所弑其後紛紛爭位干戈四起國之變亂較昔尤甚以致國人各分黨羽皆欲立其酋爲君殺戮搶奪無所不至東方各地竟爲阿付干國所獲別建一國西方各地則被那的爾沙家臣給靈者所據卽位後任賢舉能興

利除害爲一時之明君在位約三十載而殂時其弟薩
的者欲竊君位乃以鴆謀毒嗣君其後妻從子亞里木
拉亦欲竊位聲言薩的欲行篡逆乃率衆攻圍西拉斯
城越九月旣陷遂將薩的暨嗣君一併弑害僭立爲君
時國內復亂兵革滋擾乾隆五十年亞里木拉薨後國
事未定其哥麼部酋曰非爾者僭位稱王中涓馬何美
起兵攻之屢戰獲勝而有其國及薨其姪巴巴塞爾達
嗣立嘉慶十八年與厄羅斯國交兵卽義羅斯也又喪
日爾日亞地方於是通國分爲十一部大小不等一曰

義拉亞日迷爾乃國都也建于平原之中一名達巴利
一名馬郎德蘭一名義蘭一名亞塞爾拜然一名古爾
利一名古西一名發爾斯一名給爾滿一名古義一名
哥刺森其通商衝繁之地一名亞不支爾一名本德爾
亞巴西一名音西利一名巴爾福祿支

外國史略曰白西亞國北及峩羅斯裏海西域東及西
域甲布巴律坦西及亞拉並土耳其藩屬地廣袤方圓
二萬二千七百四十里居民二千一百二十五萬北極
出地自二十六度至四十度偏東自四十二度至六十

度西北多山北地尤高餘皆平坦民皆穿河灌漑海濱
廣斥卑濕而熱山亦磽确無草木惟出馬驢駝羊鼠各
多異種又產瓜豆麻烟薑鴉片絛花乳香阿魏甘棗百
果大黃硝硫磺鐵鉛銅鹽道光四年地大震山崩大邑
遂多荒蕪○白西亞本古國民昔居山內與他國無往
來周朝時有巴比倫國攻擊猶太人虜之陳高祖永定
二年白西亞朱魯士王陷巴比倫都釋猶太人厚送財
帛再建神殿而阿西亞各地皆服之其子又強陷麥西
等國恣其暴虐國人廢之別擇立賢明之大利阿王出

兵西方據地益廣降地中海各島與東北游牧之徒戰
敗退其子悉寶又攻據希臘所屬之馬基頓地王歿國
爲將軍所分及北宋時羅馬人欲占其地與白西國戰
屢年不克而退於東晉穆帝時羅馬之君議和以五部
讓白西國白西王又奪印度各國連界之亞拉地於齊
武帝永明元年與匈奴盟遂廣擴土地自地中海延及
印度雖羅馬君亦畏之唐太宗貞觀元年羅馬軍突破
其國而亞拉之回王穆哈默亦攻敗白西殺其君強百
姓歸回教不服者誅之白西國昔奉星宿太陽自太宗

貞觀九年始歸亞拉回教至南宋間五百八十四載無所變易及宋理宗二十五年元太祖起蒙古踰葱嶺西征盡降其地封其壻賽馬爾罕爲王駐阿母河西北以遙轄之至明洪武時賽馬爾罕王興師而南遍陷其地盡有西域亦奉回教及賽馬爾罕王沒大軍亦旋留諸酋長分鎮各地土耳其人乘間據白西國正德間復歸蒙古雍正元年屢與土耳其裁羅斯兩國結怨白西人素勇直性反復無常乾隆元年有蒙古王霸那得者以本國微弱遂侵五印度奪其財帛降其百姓性嗜貪境

雖廣歿後白西國遂分爲四各鄰國亦奪其土地我
斯兵之在界者屢擊敗白西人道光六年讓裏海邊地
後白西民又殺我國公使割其王之鼻耳今王於道光
十四年卽位受我羅斯之命攻喜拉城此地向屬五印
度英軍擊退之我羅斯因講和焉其國各有土酋分封
本蒙古之宗室常反側不安

其產宜麥宜瓜果多馬其民貌美女幼甚麗逾二十餘
歲遂成老醜俗尙奢靡惟利是圖其屋外樸內華其人
外謙內詐頗聰明有豪氣能詩文多尙回教喜拜太陽

火焰多出外國貿易好美其鬚乘良馬家家有浴室甚整飾語多亞拉音與土耳其國爲仇製造最巧者花毯搭膊布美兵器嵌以金銀並磁器其民不善通商故船赴海口者少亦無土產運出

其城邑最北者曰治耳文城在裏海西與俄羅斯交界平坦多五穀有油泉自土涌出每日得油千斤有自然火由淵上炎五印度敬火之人爭赴此拜之裏海之巴古海口可通商○裏海之西曰其蘭部甚豐盛出蠶絲多果木水土惡有瘟疫南有溜山路狹難通行其都會

曰勒悉城居民六萬大埠也在裏海。北部之東裏海之南有馬撒得蘭部出米穀巴佛居民四萬亞末居民三萬。阿士搭拉巴部四面雲山麗景如畫。西北之部曰亞得比安與土耳其義羅斯交界四面皆山卽古之他必城極廣大。地豐五穀並日用各物多耶穌之教。又有大城曰以利文。哥拉撒與西城白西亞國交界地甚廣有鹵野其都曰墨設城居民五萬。以拉部西連土耳其亞拉等國地多饒而產穀頗盛農皆守分其北方有新立都曰得希蘭城居民五萬大半駐兵冬來

夏去以免瘟疫其王嘗駐此以拒義羅斯其古都曰以士巴舍城百年前居民百餘萬今荒廢其海口曰布悉有貿易無戰船。注斯部之示拉士邑山川秀麗距此百餘里有古城。

其王專威好殺傲視他國侍衛二千人其都周圍以萬騎環之其游牧者各有首領戰卽召之各省所部以隨陣各營增至十五萬及二十萬人皆烏合易散近請英人及佛蘭西人訓練其兵仿歐羅巴軍令陣法以拒義羅斯然猶不能敵焉政酷而餉重故富戶甚鮮。

海國圖志卷二十四

西南洋

邵陽魏源輯

阿丹國

一作阿蘭○
天方回教考

阿丹國一作阿蘭一名阿豚比阿又曰曷刺比亞在阿細亞洲極西南東西南皆界海北界都魯機東西距千一百里南北距千五百里幅員百十六萬六千方里戶口約千萬名形勢亦居要害惟地多沙石缺源泉惟資山澗灌溉遇沙卽滲通國僅有東隅一小港耳西那山伊阿列山郎里山皆最高濱臨西海在墨加默德那各

族中不產草木故古咸謂之石阿丹然墨加之地較他處尚稱沃壤產上品乳香其史書經典皆依回教無官無王類以族分每族教頭卽部長也內地事牧畜海岸多商賈惟邊界土蠻事劫掠耶穌紀年七百以前唐武后時鄰國皆亂獨阿丹無恙有馬哈墨者被謫多年收納勇敢教以戰陣值羅汶之衰東征西討西取摩羅果又渡海取呂宋等邊地東取阿沙斯河各地遂創立法制與各教爲仇爲古今文字之一變傳及其兒子阿釐嗣衣爲大教師初尚揆實迫商旅輻輳漸卽樂逸自後復有

哈倫阿蘭士支阿爾門二人佐理大興文學因本國硯
硯遂遷於巴社卽古時巴比羅尼阿之首區也嗣被韃

韃里侵擾一空

謂元代蒙古也
曾滅回回祖國

退保本國還其樸俗不

與他國往來其濱海西岸復被都魯機奪去越二百年

明英宗正統初距元
太宗末計二百年

值都魯機衰弱始復奪回千七百

二十年

康熙五十九年

本國忽有微賤之汪都阿哈聚集徒黨

欲興復麻哈密之教刪去其附會自謂能知十來有少

年頭目依沙烏信之以兵力迫眾遵從連合各族立爲

通國教主以聖加默德那兩處爲首區威震鄰國一時

稱盛遂率其子阿巴爾臘圖據伊揖磨加等國廣行教化伊揖之巴札領兵拒敵竟擒阿巴爾臘歸國戮之然其教內之人滋蔓難圖地方遼遠兼多曠野可以乘譏出擾而外地不能進攻政事以一族爲一部每族立一教首各理各族不相統屬故阿丹之族譜推究極詳自古迄今未有改易其族中操權父老謂之小師而於眾小師中議立一師謂之大師各小師均屬之有大小無尊卑大者不能以三目居而小者亦不以臣僕稱也各族均有徽號牧畜遊牧曠野毋虞攘掠人皆悍鷙好勝

各族亦互相械鬪若能聯族合心齊力實爲勁旅阿細亞洲內強國恐非其敵歷來各國均有更亂而阿丹依然如故此外又有一人曰耶米在僻地獨立一族以貴人執政後有伊滿相繼爲政於千六百三十年明崇禎三年將都魯機人驅逐卽擅權爲教主立加底士官以判事焉阿丹之人瘦小面黃多力足智善騎射烏鎗俗尙儉節富者始食稻米皆產他國貧者僅食本地大麥以加非豆柳豆之壳浸水飲之凡菜飯皆調以駱駝乳罕肉食富家宴賓惟潔蔬菜口腹之人眾皆不齒衣則腰膊

各纏白布以便插刀惟布帽無論寒暑厚十餘層金縷繡字再垂金銀穗于兩肩其教師均出世家如歐羅巴之俗故師之名雖南面不易國中麻哈密之後裔生齒蕃多雜處民間無處不有其尊貴世家謂之煎里靡其帽貴綠又有哥厘士十二家專司教事亦得冠綠部人望之若神明俗尙刼奪務慷慨行人過境必先求其保護但有一飯之緣卽慨諾出力設無保護卽謂是應刼之物雖同處款洽而一至曠野無不刼奪如未謀面者然雖被刼之人但尾至其帳尙可動其矜憐不至全受

災害也。家居飲食時見有行人，必招同餐，恐人疑其貧。宴喜結交多禮節，乍見卽搖手爲禮，曲盡殷勤。尊長見卑幼亦然。童稚卽習禮儀，然皆虛文，鮮實器量。狹小與人有隙，不報不休；誤行觸犯，亦必報之，非特報其本人，且必誅及其族中尊貴而後已。故出門必攜利器，坐以達旦，終宵不寐，積習牢不可破。人多妻妾，別內外，民婦或可游行，若部落之女不蒙頭，卽不外行。較之都魯機巴社防範尤嚴。回教原出於阿丹，而阿丹又以馬哈墨爲最著。迨後又分兩種，一曰色底特士教，一曰比阿厘。

教各立門戶常見都魯機巴社與阿丹人爭辯教理成
仇反以馬哈墨所傳之教爲邪教是何謂耶惟阿丹人
不甚拒絕外教故歐羅巴客商往彼貿易或導人以克
力士頓教亦復客留善待不至輕忽拒絕若哇都阿哈
之教自爲伊揖敗死後教亦不甚流傳阿丹音語與由
斯及巴社等相似其書籍近多散軼因先日奪得外地
建造部落時盡將著名書籍先運往賊及至地失而書
亦隨淪本國人復又著輯論族類論仇敵論攻擊論遊
覽論女人以至小說等書近有小說謂之一千零一夜

詞雖粗俚亦不能謂之無詩才土產加非豆柳豆巴爾色馬香乳香沒藥樹膠沉香馬駱駝阿蘭爲香料聚集之埠頭名馳異域其實本國僅產乳香沒藥巴爾色馬香耳餘俱購自阿末里加洲

萬國地理全圖集曰亞刺伯卽天方阿丹回教祖國也此乃半土南及南海北至土爾其藩屬國東接白西及其海隅西及海峽名曰死門又至江海以蘇葉微地連與亞非利加大地北極出自十一度至三十一度偏東自三十度至六十度五十分長四千五百里闊三千六

百里大半沙漠，惟出棗。南方產珈琲，香味價貴。土出香料藥材，其馬大有名。上山如平地，落水如浮橋，一日能走二百里。其駝係國之舟，忍耐辛苦。陳宣帝大建元年，回教始。廝摩哈麥者，生於麥加邑。少年商遊西國，雖不識字，性好默思道理，貿易通利。一觀本地人民獨拜偶像，心內不悅。新造教門，令妻受之。其親戚朋友進教後，合爲一會。著聖書稱曰可蘭，獨一眞主上帝。而廝摩哈麥乃其所差之聖人，欲奉事上，必每日定期祈禱，念經，賜濟貧之，每年一次，連月守齋，日間不食，必須終年一次。

往摩哈麥生死之兩邑附近其墓燒香禮拜禁豕肉飲
酒固守死後卽昇上界享天女之樂但佛教之徒不肯
悅服令摩避危藏身穴內唐高祖武德四年逃麥地拿
之邑居民悅接並其從徒以此年爲元紀信徒雲集結
羣攻擊次年其敵復來固圍國邑摩哈麥募兵報讐征
取其礮臺乘機掩殺糜爛其民威權愈重是以使人遍
往四方令諸國承其教稍敢忤違率兵剿滅年及五十
督兵侵木邑拆壞菩薩酷戮異已土人畏其兵力不敢
不信服進貢如是其教廣布西域

西奈山在亞刺西北方商朝年間上帝於此處雷電外
立十條誡諭人類敬守。麥加在西方離紅海不遠回
回民於此集會拜摩哈麥所生之屋於四角一里之殿
有黑石古人所敬親嗅七次周行後洗身水源以表滌
罪巡行瞻禮上山事竣其罪一概赦免其城之居民三
萬丁每因大會生意豐盛。麥地拿係摩哈麥葬處臥
於鐵棺回回亦往彼燒香但城褊小房屋不過五百萬
年年南海西域西國與亞非虔信士不止數萬起程赴
城泛江涉嶽而至大厭繁難稠擠

地球圖說亞拉比亞國又名亞拉伯國東界白耳西亞
海南界南海西界紅海北界土耳其國其百姓約有一
萬之數都城名麥加城內民六百萬其麥加之城卽昔
回回教主摩哈麥所生之城又一城名麥地拿卽回回
教主葬地故凡西域等國不嫌千里之遠每年必數至
燒香禮拜蓋昔年回回教主摩哈麥自云奉天神親諭
令著聖書一冊名曰可蘭以示庶人若能信從卽享天
福如遇不信之徒卽行誅戮以致亞細亞之西方各國
不敢不信至禮拜日期亦以七日爲例但與耶穌教不

同回教禮拜日在耶穌教禮拜後之第五日也

地里備考曰天方國又名亞拉亞在亞細亞州之西北極出地十二度起至三十四度止經線自東三十度起至五十七度止東至科漫白爾西亞工海灣西枕紅海南連科曼海灣暨印度海北界蘇挨斯徑暨土耳其亞國長約六千里寬約五千里地面積方約八十萬里烟戶一京二兆口沙漠居多邱陵甚少一望平原曠野河之大者有二曰美丹曰北波其餘小川不注于海田土饒瘠荒野寥絕東南濱海頗爲膴腴土產銅鐵鉛龍穀

菓烟蔗香料胡椒蘇花熟皮珍珠白玉珊瑚琥珀國砂
硫磺花石等物禽獸蕃衍馬匹極良地氣互異近日稍
和各處甚熱泉少水缺人物難堪至于朝綱諸酋統轄
所奉之教乃回教也技藝庸陋貿易興隆本國自古開
基以至唐高祖武德五年歷代相傳並無分踞其後有
本國美加城回人馬何美者布傳新教煽惑民心紳衿
家皆拂其言且圖杜絕其教乃去美加城入美的納邑
居無何名溢遐邇授徒甚眾因率之以攻美加城既陷
其地復強其民遂卽位爲君敷布新教通國皆從風而

靡奉爲聖人及薨嗣君復以新教流布于亞細亞亞非里加歐羅巴三州取地甚多其後國勢凌替互相分析喪地于土耳其亞國者甚多通國分爲六域一名黑德倭斯建于山谷之中屋宇宏峻街衢闊直一名耶門一名亞達拉毛一名科曼一名刺沙一名內的惹

外國史畧曰亞拉國半地南及印度海北連土耳其藩屬地東連白爾西亞海隅西及紅海爲蘇益之微地與麥西國隔海峽卽回教之天方國也廣袤方圓五萬里居民千二百萬地多沙恒酷暑無土產惟海島中產粟

並各樹人賴以活。耶閔部廣袤方圓三千二百四十里。居民三百萬口。產香馥樹膠沒藥等貨。其都曰未加城。出珈琲東南及沙漠西及紅海。有土酋管理。與麥西定貢物。其城曰撒那。阿曼係東南之地。東及白西亞海隅。東南有沙漠。其君有權勢。亦在鄰地。或亞非利加兩海邊開埠。其城曰母士甲。居民萬二千口。是最廣之埠。○哈查係白爾白亞海隅。多海賊。○黑查乃紅海濱之聖地。有兩邑。曰黑加曰米地。那那回回所集。西北係磽地。○內地有尼耶地。居民皆背回教。○南海邊曰哈

答毛居民無幾。○此地天氣殊異，平地尤熱，夜則反冷，有數處無雨，獨降露，地乾水鹹，亦產麥及甘露、棗、繭花、藥材、烟、各種樹膠，運賣他國。馬尤駿善走，多駝，民食其肉，用其毛，資其載負，來往皆以駝爲業。多獅、駝、野羊、野獸。○土民貧而野，好游牧，搶劫以帳房爲居，牲乳爲食，各立長領，雖統屬于土耳其之君，而不遵其命，隨意恣行，有犯之者，必殺乃已。各族類亦恒相犄角。○其民自古不服他國，雖異國犯其界，俱未能勝，後亦爲希臘擊服。希臘君歿，亞拉百姓侵據河中間地，東漢安帝永初

間又爲羅馬國強服其邊地百姓或敬星宿太陽或
耶蘇教亦有猶太國人爲王禁遏耶蘇門徒于是各族
類屢鬪有穆哈默者本爲商賈遠貿易與道士往來習
印度猶太之經典隱居崖穴忽若神授因自立一教邑
之居士不信而驅逐之唐高祖武德二年穆哈默遂往
異鄉聚眾起兵立年號自稱天使屢戰獲勝四方雲從
勢日益大迫令鄰國之君棄其教而進回教風俗丕變
穆既歿其兄子嗣王位益與其教越羅馬之界攻取其
大城有不肯奉其教者誅焉後侵麥西國疆土日廣于

是北據是班東服白西亞盡占五印度國如是回回之教四布數百年有麥西賢士著書闢其說爲異端由是麥西國領太軍以驅除之其教始漸廢

亞拉國分三大分一曰石地一曰沙地一曰豐地石地在西北方猶太人初出麥西國卽至此地所謂摩西聖人受上帝命于西奈山卽此處也○穆哈默所自出之邑曰墨加者四方雲集無不敬爲聖域貿易輻輳米地那者穆所葬墓在廟內輝煌焜耀多不遠千里來禮拜之焉音破者紅海邊之港居民六千墨加之港居民萬

五千商船極多爲亞拉最豐之市埠又摩加者羅民手
千出珈琲東邊莫甲邑最旺相在白爾西海隅有海賊
巢穴英人兩次殄滅之。英人在死門海峽開埠曰亞
簪堆積石炭以便火輪船往來地甚磽居民亦少。吉
曼爲西南之地大半沙野其都會同名。近日白爾西
國王與土耳其之君分據亞拉之地居民皆在山內不
順外國之主祇貢微物而已

西印度西阿丹國沿革

唐以前名條支非回教已載西印度下唐以後爲波

斯阿丹天方默德那等國卽回教祖國也。原無今補

新唐書波斯居達遏水西距京師萬五千而贏東與吐
火羅康國接北鄰突厥可薩部西南皆瀕海西北贏四
千里接拂菻界人數十萬其先波斯匿王大月氏別裔
王因以姓又爲號治二城有大城十餘俗尊右下左祠
天地日月水火祠夕以麝採蘇澤而顏鼻耳西域諸胡
受其法以祠祆拜必交股俗跣跣丈夫祝髮衣不割襟
青白爲巾帔緣以錦婦辮髮着後戰乘象一象士百人
負則盡殺斷罪不爲文書決于廷判者鐵灼其舌瘡白
爲直黑爲曲刑有髡鉗則劓小罪髡或系木于頸以時

月而置刼盜囚終老偷者輸銀錢凡死棄于山服閱月除氣常歆熱地夷漫知耕種畜牧有鷺能噉羊多善犬驢大驢產珊瑚高不三尺隋末西突厥葉護可汗討殘其國其孫奔拂菻國人迎立之貞觀十二年遣使朝貢其王爲大酋所逐奔吐火羅半道大食擊殺之吐火羅以兵納其子龍朔初又訴爲大食所侵是時天子方遣使者到西域分置州縣以疾陵城爲波斯都督府俄爲大食所滅雖不能國咸亨中猶入朝使其子泥涅師爲質調露元年詔裴行儉將兵護還將復王其國以道遠

至安西碎葉而還泥涅師因客吐火羅景龍初西部獨
存開元天寶間遣使者十輩獻瑪瑙牀火毛繡舞筵乾
元初從大食襲廣州焚倉庫廬舍浮海走大憚時復來
獻又有陀拔斯單者其國三面阻山北瀕小海居婆里
城世爲波斯東大將波斯滅不肯臣大食後爲黑衣大
食所滅

明史天方古筠冲地一名天堂又曰默伽水道自忽魯
謨斯四十日始至自古里西南行三月始至其貢使多
從陸道入嘉峪關宣德五年鄭和使西洋分遣其儕詣

古里聞古里遣人住天方因使人贏貨物附其舟偕行往返經歲市奇珍異寶及麒麟獅子駝雞以歸其國王亦遣陪臣隨朝使來貢宏治三年其王速檀阿黑麻遣使偕撒馬兒罕土魯番貢馬駝玉石正德初帝從御馬太監谷大用言令甘肅守臣訪求諸番騾馬驢馬番使云善馬出天方守臣因請諭諸番貢使傳達其王俾以入貢嘉靖十一年遣使偕土魯番撒馬兒罕哈密諸國來貢稱王者至二十七人所遣使人倍踰恒數番文至後五六年一貢迄萬厯中不絕天方于西域爲大國四

時常似夏，無雨雹霜雪，惟露最濃，草木皆資之長養，土沃饒，粟麥黑黍人皆頡頏，男子削髮以布纏之，婦女則編髮蓋頭，不露其面相，傳回回教之祖曰馬哈麻卽謨罕，德首于此地，行教死卽葬焉，墓頂常有光，日夜不熄，後人遵其教久而不衰，故人皆向善，國無苛擾，亦無刑罰，上下安和，寇賊不作，西土稱爲樂國，俗禁酒，有禮拜寺，月初生，其王及臣民咸拜天，號呼稱揚以爲禮，寺分四方，每方九十間，共三百六十間，皆白玉爲柱，黃甘玉爲地，其堂以五色石砌成，四方平頂，內用沉香大木爲梁。

凡五又以黃金爲閣堂中垣墉悉以磬徽露龍涎香和土爲之守門以二黑獅堂左有司馬儀墓其國稱爲聖人土產寶石圍牆則黃甘玉兩旁有諸祖師傳法之堂亦以石築城俱極壯麗其崇奉回回教如此瓜果咸如中國西瓜甘瓜有一人不能舉者桃有重四五斤者雞鴨有重十餘斤者皆諸番所無也馬哈麻墓後有一井水清而甘泛海者必汲以行遇颶風取水灑之卽息當鄭和使西洋時傳其風物如此其後稱王者至二三十人其俗亦漸不如初矣

又曰默德那回回祖國也地近天方宣德時其酋長遣使偕天方使臣來貢後不復至相傳其初國王謨罕慕德即馬哈墨生而神靈盡臣服西域諸國尊爲別諸拔爾猶言天使也國中有經三十本凡三千六百餘段其書旁行兼篆草楷三體西洋諸國皆用之其教以事天爲祖而無像設每日西向虔拜每歲齋戒一月沐浴更衣居必易常處隋開皇中其國撒哈入撒阿的幹葛思始傳其教入中國迄元氏其人徧於四方皆守教不替國中城池宮室市肆田園大類中土有陰陽星歷醫藥

音樂諸技其織文製器尤巧寒暑應候民殷物繁五穀
六畜咸脩俗重殺不食猪肉嘗以白布蒙頭雖適他邦
亦不易其俗

瀛涯勝覽阿丹國瀕海富饒崇回回教阿刺壁言語情
性強梗悍戾有勝兵七八千馬步俱精鄰邦畏之自古
里國舟西行一月可至永樂九年詔中使賜命其國王
遠迎謹甚卽諭其國人就互市王頂金冠衣黃袍腰寶
粧金帶禮拜則易白纏頭以金錦爲頂衣白袍乘車列
象而行將領等冠服有差民間男則纏頭衣撒哈刺錦

繡紵絲細布有靴鞋婦人則長衣頂珠冠纓絡耳金錢寶環手金寶鐲釧足亦有環絲悅金銀器皿絕勝赤金錢曰哺嚕黎重一錢面有文紅銅錢曰哺嚕厮市易用之氣候溫和厯無閏以月出定月之大小夜見月明日又爲一月也有善推步者定某日春則花木開榮某日秋則花木凋落日月交蝕風雨潮汐無不驗者民居累石爲壁上覆以磚或土高至十四五尺市肆熟食及綺帛書籍俱如中國粒食多用酥糖蜜製味極精美厥產有米麥麻豆蔬菜果有萬年棗松子杞檐乾葡萄核桃

花紅石榴桃杏之類獸有象駝牛羊雞鴨犬猪雞犬
羊則無角領垂短毛有紫檀薔薇露簷葡萄白葡萄福
鹿青花白駝雞福鹿如騾白首白眉滿體細間道青花
如畫白駝雞如福鹿麒麟前足高九尺餘後足六尺餘
項長頭昂至一丈六尺傍耳生二短肉角牛尾鹿身食
粟豆餅餌獅子形類虎黃黑毛鉅首闊口尾稍黑其毛
如響聲吼如雷百獸見之皆伏厥貢金■寶帶珍珠八
寶金冠鴉忽等各種寶石金葉表文

明史阿丹在古里之西順風二十二晝夜可至永樂十

四年遣使奉表貢方物，辭還命鄭和齎敕及綵幣偕往，賜之。自是凡四入貢，天子亦厚加賜賚。宣德五年，海外諸番久缺貢，復命和齎敕宣諭，其王卽遣使來貢。八年，至京師。正統元年，貢使始還，自後不至。前世梁隋唐時，並有丹丹國，或言卽其地。源案史言丹丹國在振州東，接壤之國若阿丹則在西印度，又以赤土爲丹丹，則與暹羅之西相去極遠，安得混爲一乎。地膏腴，饒粟米，人性强悍，有馬步銳卒七八千人，鄰邦畏之。王及國人悉奉回教，氣候常和，歲不置閏，其定時之法以月爲準。如今夜見新月，明日卽爲月朔，四季不定，自有陰陽家推算。

其日爲春首卽有花開其日爲秋初卽有葉落乃日月
交蝕風雨潮汐皆能預測其王甚尊中國聞貨船至躬
率部領來迎入國宣詔訖徧諭其下盡出珍寶交易永
樂十九年中國周姓者往市得貓睛重二錢許珊瑚樹
高二尺者數株及大珠金珀諸色雅姑異寶麒麟獅子
花猫鹿金錢豹駝雞白鳩以歸他國所不及也蔬果畜
產咸備止無鵝與豕市肆有書籍工人所製金首飾絕
勝諸番所少惟草木國人皆壘石爲居室麒麟前足高
九尺後六尺頸長丈六尺有二短角牛尾鹿身食粟豆

餅餌獅子形似虎黑黃色無斑首大口廣尾尖聲吼若雷百獸見之皆伏地

明史嘉靖時製方邱朝日壇玉爵購紅黃玉于天方哈密諸國番不可得有通事言此玉產于阿丹去土魯番

西南二千里其地兩山對峙自爲雌雄或白鳴請如永

樂宣德故事齎重賄往購帝從部議已之此大謬阿丹即天方也既

購天方何又再購阿丹且阿丹去土魯番又豈止二千里耶當云購玉于土魯番哈密不可得人言此玉產于

關去土魯番西南二千里或云玉產天方阿丹去土魯番哈密萬二千里則得之

又曰坤城西域同回種宣德五年遣使來朝貢駝馬時

有開中之令使者卽輸米一萬六千七百石於京倉中
監及辭還願以所納米獻官帝曰回人善營利雖名朝
貢實圖貿易可酬以直於是予帛四十疋布倍之其後
亦賞貢自成祖以武定天下欲威制萬方遣使四出招
徠由是西域大小諸國莫不稽顙稱臣獻琛恐後又北
出沙漠南極溟海東西抵日出沒之處凡舟車可至者
無所不居自是殊方異域鳥言侏僂之使輻輳闕廷歲
時頒賜庫藏爲虛而四方奇珍異寶名禽殊獸進獻尙
方者亦日增月盛蓋兼漢唐之盛而有之百王所莫並

也餘威及於後嗣宣德正統朝猶多重譯而至然仁宗不務遠略踐阼之初卽撤西洋取寶之船停松花江造舟之役召西域使臣還京敕之歸國不欲疲中土以奉遠人宣德繼之雖間一遣使尋亦停止以故邊隅獲休息焉今采故牘嘗奉貢通名天朝者曰哈三曰哈烈兒曰沙的蠻曰哈的蘭曰掃蘭曰乜克力曰把力黑曰俺力曰脫忽麻曰察力失曰幹失曰卜哈刺曰怕刺曰你沙兀兒曰克失迷兒曰帖必力思曰火壇曰火占曰苦先曰牙昔曰牙兒干曰戌曰白曰兀倫曰阿端曰邪思

城曰捨黑曰擺音曰克乧計二十九部以疆域褊小止稱地面與哈烈哈實哈兒賽藍亦力把力失刺思沙鹿海牙阿速把丹皆由哈密入嘉峪關或三四五年一貢入京者不得過三十五人其不由哈密者更有乞兒麻米兒哈蘭可脫乧臘獨也的干刺竹亦不刺因格失迷乞兒吉思羽奴思哈辛十一地面亦嘗通貢

又曰魯迷去中國絕遠嘉靖三年遣使貢獅子西牛給事中鄭一鵬言魯迷非常貢之邦獅子非可育之獸請卻之以光聖德帝竟納之五年冬復以二物來貢旣頒

賜其使臣言長途跋涉費至二萬三千餘金請加賜御史張祿言華夷異方人物異性留人養畜不惟違物抑且拂人況養獅日用二羊西牛日用果餌獸相食與食人食聖賢皆惡之乞返其人卻其物薄其賞明中國不貴異物不納乃從禮官言如宏治撒馬兒罕例益之二十二年偕天方諸國貢馬及方物明年還至甘州會迺北賊入寇總兵官楊信令貢使九十餘人往禦死者九人帝聞褫信職命有司棺殮歸其喪二十七年三十三年並入貢其貢物有珊瑚琥珀金剛鑽花瓷器鑲服撒

哈喇帳羚羊角西狗皮捨狸孫皮鐵角皮之屬

瀛環志畧曰阿刺伯

亞拉彼亞 亞拉鼻亞 阿爾拉密阿 阿辣波亞 阿黎米也

阿丹 阿蘭 天方 天堂

回教初興國也北界東土耳其東界波

斯及阿勒富海南距印度海西抵勒爾西海

俗稱紅海長四

千餘里廣三十餘里地西南濱海有腴壤中央皆戈壁

沙磧也商旅必結隊以行否則虞盜劫且慮風沙埋沒物

產唯棗最多人與畜皆食之產名馬牧者愛養如兒子

能一日行五六百里駝尤良負重行遠皆賴之又產加

非香料沒藥之類其地古爲土夷散部恒役屬於波斯

陳宣帝大建元年有摩哈麥者

或作摩哈默又作瑪哈穆特

生於麥

加

一作默伽又作美加

少年爲商往來西國娶富商之寡遂至大

富不識字而性聰敏以佛教拜偶像爲非而泰西諸國

耶穌教已盛行思別創教門以自高異入山讀書數年

著書曰可蘭宣言於眾謂獨一真主上帝命聖者教化

世人初命摩西次命耶穌兩人之教雖行然不能徧及

也復命摩哈麥立教以補其缺入其教者焚香禮拜念

經禁食豬肉唐高祖武德四年逃難於麥地拿

一作默德那又

作美納

土人靡然從教卽以四年爲元紀

今回教稱一千二百幾十年卽

本於此歐羅巴則以耶穌生年其後徒黨日眾不入教

者率眾攻之兵敗徒散收合起遂滅大敵據阿刺伯

全土布其教於四鄰鄰部皆畏而從之回教遂蔓延西

土當其盛時嘗翦滅波斯荐食羅馬猶太買據阿非之

北境紅海地中海裂歐羅之西垂西班牙縱橫三土亞

亞阿非利幾於無敵後為土耳其所攻屬藩盡失日就

衰微卒乃納貢於土耳其稱藩國焉西域稱摩哈麥為

派罕巴爾華言天使也其苗裔稱和卓木華言聖裔也

巴達克山塔什干皆其支派而霍集占兄弟稱大宗回

部以爲貴種所至輒擁戴之黠虜藉其名以號召回眾
數數犯邊遂爲西鄙長患云麥加麥地拿皆在紅海之
濱摩哈麥生於麥加其地有黑石上作大殿周一里許
麥地拿爲摩哈麥葬處斂以鐵棺每歲諸回回來兩地
禮拜南洋西域泰西阿非利加近者數千里遠者數萬
里接踵膜拜以數萬計○阿剌伯地分六部首部曰黑
德倭斯都城曰麥加建於山谷之中夏屋雲連街衢闊
直海口甚大出運之貨以加非爲主販行歐羅巴各國
其海口在西方者曰熱地富商所萃在東方者曰木甲

與英吉利米利堅定約通商以兵船巡海護之。○亞丁小島也在紅海口門之外現爲英人所據。

按阿剌伯古條支國也回教旣興乃有天方天堂等名皆花門諺耀之稱比其國於天上其實本無此名其國在波斯之西南前明時累次朝貢多由西域陸路來明初鄭和等由海道使西洋至天方而止稱爲西洋盡處彼蓋由印度海駛入紅海遂以爲海盡於此而不知小西洋之外尙有所謂大西洋也。

佛教興於印度以慈悲寂滅爲歸中土士大夫推闡其

說遂開禪悅一派摩西十誡雖淺近而尙無怪說耶穌著神異之迹而其勸人爲善亦不外摩西大旨周孔之化無由宣之重譯彼土聰明特達之人起而訓俗勸善其用意亦無惡於天下特欲行其教於中華未免不知分量摩哈麥本一市僧忽起而創立教門其禮拜與天主教同所別異者僅不食豬肉一端而其獸處無倫則又爲泰西諸國之所唾棄乃自李唐以後其教漸行於西域今則玉門以西盡亞細亞之西土周迴數萬里竟無一非回教者鵲巢鼠蟻蚣甘帶孰爲正味乎正難

爲昧任侏僑者深求也。惟腥羶之俗蔓延中土，剛很毒
鷲自爲一類，非我族類，實逼處此，終貽江統憂。

後漢書：東漢和帝永元九年，西域都護班超遣掾甘英
往通大秦，抵條支，臨海欲渡安息西界，船人告以海水
廣大，往來須彌三歲糧，英疑憚而止。大秦屢欲遣使於
漢，爲安息遮遏，不得通。桓帝延熹九年，其王安敦遣使
自日南徼，獻象牙、犀角、瑇瑁，始得一通。

云

考秦西人

地圖，安息卽今之波斯，條支卽今之阿剌伯。東漢時大

秦

卽意大理
之羅馬

正當全盛，未分東西。

詳意大
里圖說

其國都在意

大里之羅馬東境至西里亞猶太即唐書之拂菻國與安息接

壤若由安息往大秦渡媯水入安息境約三千餘里即今

波斯即已入大秦東境今土耳其東土美索不達迷亞部之巴索拉地再西北行

約三千餘里今土耳其東土中土波海峽即君士但丁黑海峽日歷西臘之

北境今土耳其西土約二千里至意大里之東北境今奧地利亞地又

西南行千餘里即至大秦都城即今羅馬計陸路萬里而近

自西里亞以西皆大秦地漢書所云從安息陸路繞海

北行出海西至大秦庶連屬十里一亭三十里一置從

無盜賊寇警者的確不誣又云道多猛虎獅子遮害行

旅不百餘人，齎兵器，輒爲所食。按西里亞以西皆大秦名都大邑，四達通衢，安得有猛獸遮害行旅？蓋安息貪繒絲交市之利，必不欲大秦之通漢，故爲此誕說以阻漢使之西行。所謂遮遏不得通者，此也。若由條支從海道往，則阿非利加之大浪山一路，自明以前未通舟楫。卽今歐羅巴諸國貨船往來之歐羅巴東來海道，率取路明宏治間葡萄牙始創行之。道於地中海紅海，條支都城在麥加，乃紅海北岸。漢書云條支城在山上，周迴四十餘里，正今之麥加城也。而其東境又臨阿勒富海，甘英所臨之海未知其爲阿勒富海，抑卽紅海。若爲阿勒富

海則須繞條支三面之海計水程六七千里至紅海之

尾而海盡行陸路一百七十里

地名蘇爾士麥西國地

至地中海

之東南隅再登舟西駛約六千餘里而抵大秦都城

即羅

馬計水程一萬三千餘里若所臨係條支都城之紅海

則西北駛千餘里已至紅海之尾計水程不足萬里中

間隔陸路一百七十里不能一帆直

明以前歐羅巴大船不能直抵中國

即因此阻隔海國聞見錄所謂恨不能用力截斷者也

近年英吉利用火輪船遞送文報皆由此路地中海另

有火輪

船接遞然舍此別無道路計其水程則四五十日遲

亦不過兩三月半載儘可往返何至須齎三歲糧蓋安

息總不欲大秦之通漢故使西界船人

麥加距安息已遠甘英所臨之

海當係阿勒富海也

設此詞以難之甘英憚於浮海遂中止耳至

安敦之入貢由日南徼外卽今越南南境之占城一帶乃由紅海駛入印度海東南行至蘇門答臘噶羅巴之巽他海峽轉而北行入南洋抵越南之南境今歐羅巴諸國由粵東繞阿非利加至印度海後亦由此路若從陸路須由日南歷暹羅緬甸抵東印度越中印度至西印度無論中間歷數十番部使幣難通而西印度以西仍須經遮遏之安息方達大秦東境故知其必由海道

無疑也。大秦國之北方亦有陸路可通中國，須從塞地利亞東北行，歷義羅斯南境，至裏海之北岸，轉而東行，歷西域游牧城郭諸部，可抵玉關。此則不入安息境，無從遮遏之矣。然兩漢時，大秦北境至日耳曼而止，塞地利亞以東以北，皆匈奴別部。時義羅斯尚未立國，擾大秦邊境，斷無可通之理。故通中國，惟安息一路，既爲所遮遏，不得不由海道也。

案匈奴別部，指今俄羅斯南部，薩加社、日爾日、阿斯達拉岡、疇倫、不爾厄，然後由北哈薩克、中哈薩克、霍

罕安集延布魯特以達西域至玉門也

島夷志畧天堂地多曠漠卽古筠沖之地風景融和四時如春田沃稻饒居民樂業雲南有路可通一年之上可至其地西洋亦有路通名爲天堂有回回歷與中國授時歷前後只爭三日其選日永無差異氣候暖風俗好善男女辮髮穿細布長衫繫細布梢地產西馬高八尺許人多以馬乳拌飯爲食則人肥美貿易之貨用銀五色緞青白花器鐵鼎之屬